

PREDNACRT

Na osnovu člana 116. stav 2. Zakona o patentu ("Službeni glasnik BiH", broj 53/10) i člana 17. Zakona o Savjetu ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), Savjet ministara Bosne i Hercegovine, na prijedlog Uprave za indirektno oporezivanje, na _____ sjednici održanoj _____ 20___. godine, d o n i o j e

ODLUKU

O SPROVOĐENJU CARINSKIH MJERA ZA ZAŠTITU PRAVA NOSIOCA PATENTA

GLAVA I - OPŠTE ODREDBE

Član 1.

(Predmet)

(1) Ovom odlukom bliže se propisuje postupak sprovođenja carinskih mjera koje Uprava za indirektno oporezivanje (u daljem tekstu: UIO) preduzima:

- a) u vezi sa robom koja je predmet carinskog postupanja pri uvozu, tranzitu ili izvozu, a za koju postoji osnovana sumnja da se njome povređuju isključiva prava koja proizilaze iz patenta, konsenzualnog patenta i svjedodžbe o dodatnoj zaštiti propisana Zakonom o patentu (u daljem tekstu: povreda patenta), kao prava intelektualne svojine,
- b) u vezi sa robom iz tačke a) ovog stava za koju je pravosnažnom odlukom nadležnog suda utvrđeno da povređuje patent.

(2) Carinske mjere za zaštitu prava zbog povrede patenta u vezi sa robom iz stava (1) tačka a) ovog člana preduzimaju se u sljedećim carinski odobrenim postupanjima ili upotrebi (u daljem tekstu: carinski postupak):

- a) kada je roba prijavljena za carinski postupak: provoza, stavljanja u slobodan promet, carinsko skladištenje, unutrašnju obradu, obradu pod carinskom kontrolom, spoljnu obradu i privremeni uvoz,
- b) kada je roba prijavljena za izvoz ili ponovni izvoz,
- c) kada se u provođenju mjera carinskog nadzora u skladu sa carinskim propisima pronađe roba koja se unosi u ili iznosi iz carinskog područja Bosne i Hercegovine (u daljem tekstu: BiH),
- d) kada se roba smješta u slobodnu zonu ili slobodno skladište.

(3) Ako ovom odlukom nije drugačije propisano, odredbe koje se odnose na patent na odgovarajući način primjenjuju se i na konsekvencijalni patent i svjedodžbu o dodatnoj zaštiti.

Član 2.

(Roba kojom se povređuje patent)

U svrhu primjene ove odluke, roba kojom se povređuje patent smatra se roba koja je suprotno odredbama čl. 66. i 67. Zakona o patentu proizvedena, odnosno izrađena prema pronalasku zaštićenim patentom i zaštićenom biološkom materijalu bez saglasnosti nosioca patenta.

Član 3.

(Izuzete od primjene)

Ova odluka, u skladu sa članom 115. stav (4) Zakona o patentu, ne primjenjuje se na uvoz, tranzit ili izvoz robe u malim količinama namijenjenim za privatnu i nekomercijalnu upotrebu, koje se unose ili iznose kao dio ličnog prtljaga ili šalju u malim pošiljkama.

GLAVA II - ZAHTJEV I ODOBRENJE ZA PREDUZIMANJE CARINSKIH MJERA ZA ZAŠTITU PRAVA ZBOG POVREDE PATENTA

Član 4.

(Lice koje može tražiti
preduzimanje carinskih mjera i zastupanje)

(1) Preduzimanje carinskih mjera za zaštitu prava zbog povrede patenta može tražiti lice (fizičko ili pravno) koje je nosilac isključivih prava prema Zakonu o patentu (u daljem tekstu: nosilac prava), i to:

- a) nosilac patenta - lice kojem je, u skladu sa Zakonom o patentu, priznat i registrovan patent,
- b) sticalac prava - lice na koje su, u skladu sa Zakonom o patentu, prenesena određena prava iz patenta ugovorom o potpunom ili djelimičnom prenosu prava iz patenta, i to za obim prenesenih prava iz patenta,
- c) ovlašćeni korisnik prava:
 - 1) lice kojem je nosilac patenta, u skladu sa Zakonom o patentu, ugovorom o licenci, ustupio pravo iskorišćavanja zaštićenog pronalaska i to prema obimu licence i
 - 2) lice kojem je Sud BiH ili Savjet ministara BiH izdao prisilnu licencu u skladu sa Zakonom o patentu, i to za iskorišćavanje zaštićenog pronalaska odobrenog prisilnom licencom za vrijeme trajanja te licence,
- d) nosilac međunarodno registrovanog patenta - lice koje je nosilac međunarodno registrovanog patenta koji je zaštićen i u BiH.

(2) Lice iz stava (1) ovog člana, u postupku carinske zaštite prava zbog povrede patenta u skladu sa odredbama ove odluke, može istupati samostalno ili putem zastupnika.

Član 5.

(Zahtjev za preduzimanje carinskih mjera
za zaštitu prava zbog povrede patenta)

(1) Zahtjev za preduzimanje carinskih mjera za zaštitu prava zbog povrede patenta (u daljem tekstu: zahtjev) podnosi se Središnjem uredu UIO (u daljem tekstu: Središnji ured) u pismenom obliku ili tehnikom obrade podataka (elektronskom razmjenom podataka) ako to dopuštaju tehničke mogućnosti i ako upotrebu takvog sistema odobri UIO. Na podnošenje zahtjeva putem tehnike obrade podataka, na odgovarajući način primjenjuju se odredbe carinskih propisa koje uređuju upotrebu sistema tehnike obrade podataka.

(2) Zahtjev se podnosi, u dva primjerka, na obrascu iz Priloga 1., koji je sastavni dio ove odluke. Zahtjev mora da sadrži sve potrebne podatke, kako bi se omogućilo da roba koja je u pitanju odmah bude prepoznata od strane carinskog organa, a naročito sljedeće:

- a) podatke o podnosiocu zahtjeva i o nosiocu prava, ako se ne radi o istom licu,
- b) tačan i detaljan opis robe, koji carinskom organu omogućava identifikaciju robe,
- c) dokaz o tome da je podnosilac zahtjeva, odnosno lice koje je on ovlastio, nosilac isključivog prava u vezi s odnosnom robom,
- d) dokaz o tome da je isključivo pravo vjerovatno povrijeđeno,
- e) ime i adresu kontakt osobe koju je odredio nosilac prava,
- f) sve informacije koje nosilac prava može imati, a koje su specifične za vrstu ili način povrede njegovog prava,

- g) vremenski period u kojem se zahtjeva preduzimanje carinskih mjera,
- h) druge raspoložive podatke koji su poznati nosiocu prava, kao što su:
 - 1) vrijednost originalne robe prije oporezivanja na legalnom tržištu u BiH,
 - 2) podaci o lokaciji robe i njenoj destinaciji,
 - 3) podaci za identifikaciju pošiljke ili pakovanja i ambalaže robe,
 - 4) podaci o carinskom organu kojem će, prema očekivanju, roba biti dopremljena (predočena),
 - 5) očekivani datum dolaska ili odlaska pošiljke,
 - 6) podaci o sredstvu transporta,
 - 7) podaci o uvozniku, izvozniku, primaocu ili licu koje je ovlašćeno za raspolaganje robom,
 - 8) zemlja ili zemlje proizvodnje, te putevi prevoza,
 - 9) tehničke i druge razlike između originalne i robe za koju se sumnja da povređuje patent.

(3) Uz zahtjev se prilaže dokaz da je podnosilac zahtjeva nosilac prava i druga potrebna dokumenta, i to kada zahtjev podnosi:

- a) nosilac patenta iz člana 4. stav (1) tačka a) ove odluke: rješenje o priznanju patenta ili rješenje o dodjeli konsenzualnog patenta ili rješenje o izdavanju svjedodžbe o dodatnoj zaštiti (zavisno od situacije), isprava o patentu i izjava iz člana 6. stav (1) ove odluke,
- b) sticalac prava iz člana 4. stav (1) tačka b) ove odluke: rješenje o upisivanju prenosa patenta u odgovarajući registar kod Instituta za intelektualnu svojinu BiH (u daljem tekstu: Institut BiH), ugovor o prenosu prava iz patenta ili druga isprava na osnovu koje je donijeto navedeno rješenje i izjava iz člana 6. stav (1) ove odluke,
- c) ovlašćeni korisnik prava iz člana 4. stav (1) tačka c) ove odluke: rješenje o upisivanju ugovora o licenci kod Instituta BiH ili odluka nadležnog organa o izdavanju prisilne licence (zavisno od situacije) i izjava iz člana 6. stav (1) ove odluke,
- d) nosilac međunarodno registrovanog patenta iz člana 4. stav (1) tačka d) ove odluke: dokaz da je nosilac međunarodno registrovanog patenta koji je zaštićen i u BiH i izjava iz člana 6. stav (1) ove odluke.

(4) Ako zahtjev u ime nosioca prava iz stava (3) ovog člana podnosi njegov zastupnik, uz zahtjev se mora priložiti i punomoć o zastupanju u postupku carinske zaštite, koja mora biti ovjerena kod notara, osim u slučaju kada je zastupnik advokat. Ako je u pitanju zastupanje nosioca prava iz stava (3) tačka d) ovog člana, uz zahtjev se podnosi i izjava zastupnika iz člana 6. stav (3) ove odluke.

(5) Od podnosioca zahtjeva, ovisno od situacije, mogu se zatražiti i dodatni podaci, uključujući i podatke o mjestu izrade ili proizvodnje robe, distribucijskoj mreži i korisnicima licenci.

(6) Uz zahtjev se može dostaviti i uzorak robe koja je predmet povrede patenta, kao i uzorak originalne robe, fotografije i slično.

Član 6.

(Izjava nosioca prava)

(1) Uz zahtjev se podnosi izjava nosioca prava koji je podnio zahtjev, ovjerena kod notara. Izjavom, nosilac prava, prihvata odgovornost za štetu koja može nastati licima koja učestvuju u nekom od carinskih postupaka navedenih u članu 1. stav (2) ove odluke, u slučaju kada su carinske mjere koje su preduzete u skladu sa odredbama ove odluke prekinute usljed postupanja ili propusta nosioca prava, ili ako se za odnosnu robu utvrdi da ne povređuje pravo (patent).

(2) Izjavom iz stava (1) ovog člana, nosilac prava se obavezuje da će snositi i sve troškove koji nastanu u vezi sa smještajem, čuvanjem i održavanjem robe za koju su preduzete carinske mjere za zaštitu prava zbog povrede patenta u skladu sa odredbama ove odluke, kao i druge troškove koji mogu nastati u skladu sa odredbama ove odluke.

(3) Ako zahtjev u ime nosioca prava iz člana 5. stav (3) tačka d) ove odluke, podnosi njegov zastupnik, izjava iz stava (1) ovog člana, mora da sadrži i klauzulu kojom taj nosilac prava na zastupnika

prenosi obavezu plaćanja svih troškova koji proizilaze iz preduzimanja carinskih mjera u skladu sa odredbama ove odluke u njegovo ime. U tom slučaju, uz zahtjev mora biti priložena i izjava zastupnika navedenog nosioca prava, ovjerena kod notara, kojom zastupnik, u ime zastupanog nosioca prava, preuzima obavezu plaćanja svih troškova koji proizilaze iz preduzimanja carinskih mjera u skladu sa odredbama ove odluke.

(4) Izjava nosioca prava iz stava (1) ovog člana podnosi se na obrascu iz Priloga 2., a izjava zastupnika nosioca prava iz stava (3) ovog člana na obrascu iz Priloga 3., a koji prilozi su sastavni dio ove odluke.

Član 7.

(Postupanje po zahtjevu)

(1) Ako podnijeti zahtjev sadrži sve podatke i isprave propisane čl. 5. i 6. ove odluke, odnosno ispunjava uslove, Središnji ured odobrava provođenje zatraženih carinskih mjera za zaštitu prava zbog povrede patenta (odobrava zahtjev), o čemu, u skraćenom postupku, u vidu zabilješke na obrascu podnijetog zahtjeva (u oba primjerka), donosi rješenje, nakon čega jedan primjerak dostavlja podnosiocu zahtjeva.

(2) Vremenski period na koji se, po zahtjevu nosioca prava, može odobriti provođenje carinskih mjera za zaštitu prava zbog povrede patenta, shodno članu 113. stav (2) tačka f) Zakona o patentu, ne može biti duži od dvije godine od dana podnošenja zahtjeva.

(3) U slučaju odbijanja zahtjeva, Središnji ured o tome donosi rješenje u pismenom obliku.

(4) U slučaju prestanka prava (npr. rješenje o priznanju patenta proglašeno je ništavim ili je patent prestao) ili drugih promjena, nosilac prava obavezan je o promjeni obavijestiti Središnji ured, u roku od osam radnih dana od dana nastanka promjene.

(5) Nosilac prava dužan je dostaviti sve dodatne podatke potrebne za preduzimanje carinskih mjera za zaštitu prava zbog povrede patenta.

(6) U smislu ove odluke kao radni dan smatra se radna nedjelja od ponedjeljka do petka.

GLAVA III - PREDUZIMANJE CARINSKIH MJERA ZA ZAŠTITU PRAVA ZBOG POVREDE PATENTA PO ODOBRENOM ZAHTJEVU NOSIOCA PRAVA

Član 8.

(Privremeno zadržavanje robe po zahtjevu nosioca prava)

(1) Ako carinski organ, pri provođenju mjera carinskog nadzora ili provjere robe, odnosno provođenju carinskog postupka iz člana 1. stav (2) ove odluke, identifikuje robu koja odgovara opisu robe navedenom u rješenju iz člana 7. stav (1) ove odluke (rješenje na obrascu podnijetog zahtjeva) a za koju postoji osnovana sumnja da se njome povređuje patent, po potrebi i uz konsultacije sa nosiocem prava, privremeno će prekinuti dalje provođenje zahtjevanog carinskog postupka i obustaviti puštanje odnosno robe, o čemu će, bez odlaganja, obavijestiti Središnji ured.

(2) Nakon izvršenog pregleda robe iz stava (1) ovog člana i sastavljanja zapisnika o utvrđenom stanju, nadležni carinski organ dostavlja Središnjem uredu pismenu obavijest o toj robi.

(3) Na osnovu obavijesti iz stava (2) ovog člana, a shodno članu 113. stav (1) Zakona o patentu, Središnji ured, odmah, u pismenom obliku, donosi rješenje o prekidu zahtjevanog carinskog postupka i privremenom zadržavanju robe do okončanja postupka privremenog zadržavanja robe u skladu sa članom

11. ovog uputstva. Rješenje se odmah dostavlja nosiocu prava, uvozniku (licu na koje glase robna dokumenta) i carinskom organu koji, na osnovu rješenja, privremeno zadržava odnosnu robu.

(4) U rješenju iz stava (3) ovog člana navodi se naziv prava za koje se smatra da je povrijeđeno, stvarna ili pretpostavljena vrsta robe, stvarna ili procijenjena količina robe, zatim da uvoznik robe, u roku od deset radnih dana, odnosno tri radna dana u slučaju lako kvarljive robe od dana privremenog zadržavanja robe, može pismeno da se izjasni o tome da li se radi o povredi patenta ili ne, te obaveza nosiocu prava da, u roku iz člana 10. ove odluke, podnese dokaz o podnijetoj tužbi za utvrđivanje povrede patenta ili pismenu izjavu uvoznika iz člana 15. stav (3) tačka b) ove odluke. Rok od deset, odnosno tri radna dana računa se od dana prijema rješenja iz stava (3) ovog člana.

(5) Ako uvoznik robe, u roku iz stava (4) ovog člana, ne dostavi Središnjem uredu pismenu izjavu (u dva primjerka) o tome da li se radi o povredi patenta ili ne, roba se, na zahtjev nosioca prava, može uništiti u skladu sa članom 15. ove odluke.

(6) Kada uvoznik robe, u roku iz stava (4) ovog člana, dostavi Središnjem uredu pismenu izjavu o tome da li se radi o povredi patenta ili ne, Središnji ured odmah o zaprimljenoj izjavi obavještava nosioca prava, uz koju obavijest dostavlja zaprimljenu izjavu. Ukoliko, u roku iz stava (4) ovog člana, Središnji ured ne primi pismenu izjavu uvoznika robe o tome da li se robom povređuje patent ili ne, o tome, po proteku tri radna dana od isteka navedenog roka, obavještava nosioca prava.

(7) U svrhe iz stava (1) ovog člana i člana 7. ove odluke, uz osiguranje zaštite povjerljivih podataka i obavezu čuvanja profesionalne tajne, nadležna organizaciona jedinica UIO ovlašćena je na provođenje svih propisanih radnji iz djelokruga svoga rada koje su usmjerene na potvrđivanje elemenata opravdanosti sumnje u povredu patenta, što između ostalog, uključuje provođenje konsultacija sa predstavnikom nosioca prava (u pravilu sa osobom zaduženom za tehnička i administrativna pitanja iz zahtjeva, osobe iz polja 6. i 7. zahtjeva), uz provjeru određenih podataka uvidom u evidencije kojima raspolaže (*on-line* dostupne baze podataka Instituta BiH, WIPO - World Intellectual Property Organization - Svjetske organizacije za intelektualnu svojinu i drugo).

Član 9.

(Postupanje u vezi sa
privremeno zadržanom robom)

(1) Carinski organ koji je, na osnovu rješenja iz člana 8. stav (3) ove odluke, privremeno zadržao robu, na zahtjev i o trošku nosiocu prava ili lica koje on ovlasti i uvoznika robe, omogućiće pod carinskim nadzorom pregled robe koja je privremeno zadržana po rješenju, fotografisanje i uvid u podnesene isprave o unosu robe u carinsko područje BiH ili iznosu robe iz tog područja, u obimu koji je potreban za utvrđivanje njihovih zahtjeva i za ostvarivanje sudske zaštite njihovih prava, uz obezbjeđenje zaštite povjerljivih podataka.

(2) Prilikom pregleda privremeno zadržane robe, carinski organ će, na izričit zahtjev nosioca prava, a isključivo u svrhe analize, te da bi se olakšao dalji postupak, uzeti uzorke te robe i predati ih nosiocu prava. Analiza uzetih uzoraka se provodi pod isključivom odgovornošću i o trošku nosioca prava. Ako to okolnosti dopuštaju i zavisno o primjeni člana 15. ove odluke, uzorci se moraju vratiti nakon završene analize, po mogućnosti prije nego što se privremeno zadržana roba pusti u zahtjevani carinski postupak. Primjerak zapisnika o uzimanju uzoraka, carinski organ uručuje nosiocu prava. Uz zapisnik o uzimanju uzoraka obavezno se prilažu fotografije odnosne robe, na čiju poleđinu se upisuje datum i vrijeme uzimanja uzoraka, broj i datum rješenja iz stava (1) ovog člana, šifra i potpis postupajućeg carinskog službenika i stavlja otisak službenog pečata.

(3) Ako je samo za jedan dio prijavljene robe postojala opravdana sumnja da povređuje patent i donijeto je rješenje o privremenom zadržavanju te robe, za ostatak pošiljke se, u skladu sa carinskim propisima, provodi traženi carinski postupak.

(4) Ako nosilac prava, u roku iz člana 10. ove odluke, ne podnese dokaz o pokrenutom sudskom postupku za utvrđivanje povrede patenta ili ne dođe do primjene člana 15. ove odluke, privremeno zadržana roba će se pustiti u zahtjevani carinski postupak.

(5) Središnji ured će, uz osiguranje zaštite povjerljivih podataka i obavezu čuvanja profesionalne tajne, obavijestiti nosioca prava, na njegov zahtjev i ako je poznato, o nazivu i adresi primaoca, pošiljaoca, te o porijeklu robe za koju se opravdano sumnja da povređuje patent.

(6) Nosilac prava koji je, shodno stavu (5) ovog člana, obaviješten smije koristiti tu obavijest, odnosno podatke iz te obavijesti samo u svrhu koja je određena čl. 10. i 15. ove odluke. Ako drugim propisima nije drugačije propisano, svako korišćenje obavijesti iz stava (5) ovog člana suprotno svrsi određenoj čl. 10. i 15. ove odluke, može imati za posljedicu građanskopravnu odgovornost nosioca prava, te dovesti do ukidanja rješenja iz člana 7. stav (1) ove odluke.

Član 10.

(Obavijest o podnošenju tužbe)

(1) Nosilac prava obavezan je, u roku od deset radnih dana od dana prijema obavijesti iz člana 8. stav (6) ove odluke, pismeno obavijestiti Središnji ured da je u vezi sa privremeno zadržanom robom nadležnom sudu podnio tužbu za utvrđivanje povrede patenta, uz koju obavijest mora biti priložena kopija tužbe sa dokazom o njenom podnošenju sudu.

(2) Ako posebne okolnosti to opravdavaju, Središnji ured može, na obrazloženi zahtjev nosioca prava, produžiti rok iz stava (1) ovog člana za daljih deset radnih dana. Zahtjev za produženje roka mora se podnijeti prije isteka roka iz stava (1) ovog člana.

(3) U slučaju lako kvarljive robe za koju se sumnja da se njome povređuje patent, rok iz stava (1) ovog člana iznosi tri radna dana, koji rok se ne može produžiti.

GLAVA IV - OKONČANJE PRIVREMENOG ZADRŽAVANJA ROBE

Član 11.

(Način okončanja privremenog zadržavanja robe)

Postupak privremenog zadržavanja robe, koji je započet donošenjem rješenja iz člana 8. stav (3) ove odluke, okončava se (prestaje) na jedan od sljedećih načina:

- a) stavljanjem robe u zahtjevani carinski postupak, ako nosilac prava nije, u roku iz člana 10. ove odluke, pokrenuo sudski postupak za utvrđivanje povrede patenta ili je u tom roku obavijestio Središnji ured da u vezi sa privremeno zadržanom robom ne namjerava preduzimati mjere shodno odredbama ove odluke ili nije došlo do primjene člana 15. ove odluke,
- b) donošenjem odluke o zapljeni robe do prijema pravosnažne odluke nadležnog suda, u skladu sa članom 13. ili članom 14. stav (6) ove odluke,
- c) puštanjem robe u zahtjevani carinski postupak shodno članu 14. ove odluke,
- d) uništenjem robe u skladu sa članom 15. ove odluke.

Član 12.

(Stavljanje privremeno zadržane robe u zahtjevani carinski postupak)

Ako nosilac prava, u roku iz člana 10. ove odluke, ne pokrene sudski postupak za utvrđivanje povrede patenta ili je u tom roku obavijestio Središnji ured da u vezi sa privremeno zadržanom robom ne namjerava preduzimati mjere shodno odredbama ove odluke ili ako ne pokrene postupak za uništenje robe u skladu sa članom 15. ove odluke, prestaje privremeno zadržavanje robe. U tom slučaju, nadležni carinski

organ će, po dobijanju obavijesti o prestanku privremenog zadržavanja robe od Središnjeg ureda, odobriti stavljanje iste u zahtjevani carinski postupak na osnovu podnijete carinske prijave, uz ispunjenje uslova propisanih za stavljanje odnosne robe u taj postupak.

Član 13. (Zapljena robe)

(1) Ako nosilac prava postupi u skladu sa članom 10. ove odluke i nadležni sud donese odluku o privremenoj mjeri zadržavanja robe u roku iz člana 10. ove odluke od dana podnošenja tužbe, koju odluku je nosilac prava obavezan dostaviti Središnjem uredu u roku od tri radna dana od dana prijema takve odluke, Središnji ured, u roku od pet radnih dana od dana prijema te odluke donosi rješenje o zapljeni robe do prijema pravosnažne odluke nadležnog suda.

(2) Rješenje iz stava (1) ovog člana dostavlja se nosiocu prava, uvozniku robe i carinskom organu koji je, na osnovu rješenja iz člana 8. stav (3) ove odluke, privremeno zadržao odnosnu robu. Ukoliko je rješenjem zaplijenjena sva prijavljena roba, rješenjem se, ako je to potrebno, može poništiti podnijeta carinska prijava.

(3) Robu zaplijenjenu po rješenju iz stava (1) ovog člana nosilac prava obavezan je, u roku od tri radna dana od dana prijema rješenja, o svom trošku, staviti u postupak carinskog skladištenja shodno važećim carinskim propisima i izmiriti sve troškove nastale u postupku privremenog zadržavanja te robe do njenog stavljanja u postupak carinskog skladištenja.

(4) Ako nosilac prava robu zaplijenjenu po rješenju iz stava (1) ovog člana ne stavi u postupak carinskog skladištenja u roku iz stava (3) ovog člana i ne izmiri troškove, nadležni carinski organ će odobriti stavljanje zaplijenjene robe u zahtjevani carinski postupak, uz ispunjenje ostalih uslova propisanih za stavljanje odnosne robe u taj postupak.

(5) Pravosnažnu odluku koju je nadležni sud donio po tužbi nosioca prava za utvrđivanje povrede patenta, nosilac prava obavezan je dostaviti Središnjem uredu u roku od osam radnih dana od prijema takve odluke.

(6) Ako pravosnažnom odlukom nadležnog suda nije utvrđena povreda patenta, nadležni carinski organ će odobriti stavljanje zaplijenjene robe u zahtjevani carinski postupak, radi čega će, odmah po dobijanju navedene odluke od Središnjeg ureda, pismeno obavijestiti uvoznika da robu može staviti u zahtjevani carinski postupak, uz ispunjenje ostalih uslova propisanih za stavljanje odnosne robe u taj postupak.

(7) U slučaju iz stava (6) ovog člana, datum koji treba da se koristi s ciljem primjene svih propisa kojima se reguliše carinski postupak za koji je, nakon pravosnažne odluke suda, zaplijenjena roba prijavljena je datum prihvatanja carinske prijave za taj postupak od strane carinskog organa.

Član 14. (Zahtjev uvoznika za puštanje privremeno zadržane robe)

(1) Ako nosilac prava postupi u skladu sa članom 10. ove odluke, a nadležni sud ne donese odluku o privremenoj mjeri zadržavanja robe u roku iz člana 10. ove odluke od dana podnošenja tužbe, shodno članu 114. stav (7) Zakona o patentu, uvoznik ima pravo da zahtjeva oslobađanje, odnosno puštanje privremeno zadržane robe u zahtjevani carinski postupak ako položi osiguranje (garanciju).

(2) U slučaju iz stava (1) ovog člana, pismeni zahtjev za puštanje privremeno zadržane robe u zahtijevani carinski postupak i ukidanje odluke o privremenom zadržavanju robe, podnosi se Središnjem uredu, u roku od deset radnih dana od isteka roka iz stava (1) ovog člana, ako su ispunjeni sljedeći uslovi:

- a) da je Središnji ured, u roku iz člana 10. ove odluke, u pismenom obliku, obaviješten o podnošenju tužbe za utvrđivanje povrede patenta,

- b) da do isteka roka iz stava (1) ovog člana nadležni sud nije donio odluku o privremenoj mjeri zadržavanja robe,
- c) da su ispunjeni i ostali uslovi propisani za stavljanje odnosne robe u zahtijevani carinski postupak.

(3) Osiguranje iz stava (1) ovog člana mora biti u iznosu dovoljnom za eventualnu naknadu štete nosiocu prava, koje osiguranje se polaže kod nosioca prava i ono neće uticati na druga pravna sredstva koja su na raspolaganju nosiocu prava. Visinu i druge elemente tog osiguranja, dogovorom, određuju nosilac prava i podnosilac zahtjeva iz stava (2) ovoga člana. Nosilac prava, radi odlučivanja o zahtjevu iz stava (2) ovog člana, obavezan je Središnjem uredu dostaviti pismenu izjavu o tome da li mu je podnosilac navedenog zahtjeva položio osiguranje i da li prihvata položeno osiguranje, ovjerenu kod notara.

(4) Rješenje po zahtjevu iz stava (2) ovog člana donosi Središnji ured i dostavlja ga podnosiocu zahtjeva, nosiocu prava i nadležnom carinskom organu.

(5) Prije preuzimanja robe, podnosilac zahtjeva iz stava (2) ovoga člana, obavezan je podmiriti troškove nastale u vezi sa smještajem, čuvanjem i održavanjem robe.

(6) Ako uvoznik u slučaju iz stava (1) ovog člana, u roku iz stava (2) ovog člana, ne podnese zahtjev za puštanje privremeno zadržane robe, Središnji ured, u roku od pet radnih dana od isteka roka iz stava (2) ovog člana, donosi rješenje o zapljeni robe do prijema pravosnažne odluke nadležnog suda, u kom slučaju se odgovarajuće primjenjuje član 13. stav. (2) do (7) ove odluke.

Član 15.

(Uništenje privremeno zadržane robe po zahtjevu nosioca prava)

(1) Roba privremeno zadržana po rješenju iz člana 8. stav (3) ove odluke za koju postoji osnovana sumnja da se njome povređuje patent, može se, na zahtjev nosioca prava, u skladu sa članom 114. stav (2) Zakona o patentu, oduzeti i uništiti pod carinskim nadzorom, bez obaveze da se prethodno u sudskom postupku utvrdi da li je povrijeđen patent po važećim propisima.

(2) Uništenje privremeno zadržane robe, na zahtjev nosioca prava, može se odobriti pod sljedećim uslovima:

- a) da je nosilac prava, u roku iz člana 10. ove odluke, pismeno obavijestio Središnji ured da roba povređuje patent i da je uz tu obavijest dostavio pismenu izjavu uvoznika iz stava (3) tačka b) ovog člana,
- b) da je uvoznik robe, u roku iz člana 8. stav (4) ove odluke, dostavio Središnjem uredu pismenu izjavu o tome da se radi o povredi patenta ili ako u tom roku ne dostavi pismenu izjavu.

(3) Zahtjev za uništenje privremeno zadržane robe podnosi se Središnjem uredu, u roku iz člana 10. ove odluke. Uz zahtjev, nosilac prava prilaže:

- a) pismenu izjavu da se privremeno zadržanom robom povređuje patent, ovjerenu kod notara,
- b) pismenu izjavu uvoznika da je saglasan sa uništenjem privremeno zadržane robe, ovjerenu kod notara.

(4) Smatra se da je saglasnost iz stava (3) tačka b) ovog člana data ako, u roku iz člana 8. stav (4) ove odluke, uvoznik ne podnese prigovor protiv uništenja robe.

(5) Ako uvoznik robe, u roku iz člana 8. stav (4) ove odluke, Središnjem uredu podnese pismenu izjavu o tome da se ne radi o povredi prava u vezi patenta, smatra se da nisu ispunjeni uslovi za uništenje privremeno zadržane robe u skladu sa ovim članom.

(6) Rješenje po zahtjevu iz stava (3) ovog člana donosi Središnji ured i dostavlja ga podnosiocu zahtjeva, uvozniku robe i nadležnom carinskom organu.

(7) Prije uništenja privremeno zadržane robe, nadležni carinski organ može, na zahtjev i o trošku nosioca prava ili lica koje on ovlasti i uvoznika robe, omogućiti uzimanje uzoraka predmetne robe u obimu koji je potreban kao dokaz u slučaju pokretanja sudskog postupka. Uzeti uzorci robe predaju se na čuvanje licu koje je tražilo uzimanje uzoraka, uz potvrdu prijema, kojem licu nadležni carinski organ uručuje i primjerak zapisnika o uzimanju uzoraka. Uz zapisnik o uzimanju uzorka obavezno se prilažu fotografije odnosne robe, na čiju poleđinu se upisuje datum i vrijeme uzimanja uzorka, broj i datum rješenja iz stava (6) ovog člana, šifra i potpis carinskog službenika i stavlja otisak službenog pečata.

(8) Za uništenje privremeno zadržane robe odgovoran je nosilac prava, koji i organizuje i snosi troškove uništenja robe, što uključuje i pribavljanje svih saglasnosti ili dozvola nadležnih organa potrebnih za uništenje odnosne robe. O vremenu i mjestu uništenja privremeno zadržane robe, nosilac prava dužan je blagovremeno obavijestiti nadležni carinski organ, čiji carinski službenici prisustvuju uništenju robe.

(9) O uništenju privremeno zadržane robe, nosilac prava ili lice koje uništava robu, sačinjava zapisnik kojeg potpisuje nosilac prava, carinski službenici i ostala lica koja prisustvuju uništenju robe. Jedan primjerak zapisnika, nosilac prava dužan je dostaviti Središnjem uredu, najkasnije u roku od tri radna dana po izvršenom uništenju robe.

(10) Uništenjem privremeno zadržane robe u skladu sa ovim članom ne smiju nastati troškovi na teret UIO, odnosno države BiH.

GLAVA V - POSTUPANJE SA ZAPLIJENJENOM ROBOM ZA KOJU JE UTVRĐENO DA POVREĐUJE PATENT

Član 16.

(Postupanje sa zaplijenjenom robom)

Roba zaplijenjena po rješenju iz člana 13. ili člana 14. stav (6) ove odluke za koju se, pravosnažnom odlukom nadležnog suda, utvrdi da povređuje patent ne može biti:

- a) puštena u slobodan promet,
- b) iznijeta iz carinskog područja BiH,
- c) izvezena, osim ako je uništenje robe neophodno obaviti u inostranstvu,
- d) ponovno izvezena, osim ako je uništenje robe neophodno obaviti u inostranstvu,
- e) stavljena u postupak obustave plaćanja ili postupak sa ekonomskim učinkom,
- f) smještena u slobodnu zonu ili slobodno skladište.

Član 17.

(Uništenje zaplijenjene robe)

(1) Za zaplijenjenu robu iz člana 16. ove odluke za koju je pravosnažnom odlukom nadležnog suda utvrđeno da povređuje patent, Središnji ured će, po službenoj dužnosti, donijeti rješenje o njenom uništenju, ako iz sudske odluke ne proizilazi drugačije.

(2) Na postupak uništenja zaplijenjene robe iz stava (1) ovog člana odgovarajuće primjenjuju se član 15. stav (8) i (9) ove odluke.

**GLAVA VI - PREDUZIMANJE CARINSKIH MJERA ZA ZAŠTITU
PRAVA ZBOG POVREDE PATENTA PO SLUŽBENOJ DUŽNOSTI**

Član 18.

(Pokretanje postupka po službenoj dužnosti)

(1) Ako carinski organ, pri provođenju mjera carinskoga nadzora ili provjere robe, odnosno provođenju carinskog postupka iz člana 1. stav (2) ove odluke, a prije nego što je zahtjev iz člana 5. ove odluke podnesen ili odobren, utvrdi postojanje osnovane sumnje da se predmetnom robom povređuje patent, tada će, shodno članu 115. stav (1) Zakona o patentu, po službenoj dužnosti (*ex officio*) prekinuti dalje provođenje zahtjevanog carinskog postupka i privremeno zadržati puštanje robe na rok od pet radnih dana, o čemu će, bez odlaganja, obavijestiti Središnji ured.

(2) Na osnovu obavijesti iz stava (1) ovog člana, a shodno članu 115. stav (2) Zakona o patentu, Središnji ured će odmah, ako je poznat, obavijestiti nosioca prava o privremenom zadržavanju robe po službenoj dužnosti, o sumnji da se radi o povredi njegovog prava (patenta), te da u roku od pet radnih dana od dana zadržavanja robe može podnijeti pismeni zahtjev iz člana 5. ove odluke. Primjerak obavijesti Središnji ured dostaviće i uvozniku robe i nadležnom carinskom organu. Rok od pet radnih dana računa se od dana prijema obavijesti o privremenom zadržavanju robe po službenoj dužnosti.

(3) Ako Središnjem uredu nije poznat odnosni nosilac prava, o tome će odmah obavijestiti nadležni carinski organ. Nadležni carinski organ, u tom slučaju, odobriće stavljanje privremeno zadržane robe u zahtjevani carinski postupak, radi čega će, odmah pismeno obavijestiti uvoznika da robu može staviti u zahtjevani carinski postupak, uz ispunjenje ostalih uslova propisanih za stavljanje odnosne robe u taj postupak.

Član 19.

(Postupanje nosioca prava)

(1) Ako nosilac prava, u roku iz člana 18. stav (2) ove odluke, podnese pismeni zahtjev iz člana 5. ove odluke, Središnji ured UIO će donijeti rješenje o privremenom zadržavanju robe do donošenja rješenja po zahtjevu.

(2) U rješenju iz stava (1) ovog člana navodi se naziv prava za koje se smatra da je povrijeđeno, stvarna ili pretpostavljena vrsta robe, stvarna ili procijenjena količina robe, zatim da uvoznik robe, u roku od deset radnih dana, odnosno tri radna dana u slučaju lako kvarljive robe od dana privremenog zadržavanja robe može da se pismeno izjasni o tome da li se radi o povredi patenta ili ne, te obaveza nosiocu prava, ako njegovom zahtjevu bude udovoljeno, da u roku iz člana 10. ove odluke, podnese dokaz o podnijetoj tužbi za utvrđivanje povrede prava na patent ili pismenu izjavu uvoznika iz člana 15. stav (3) tačka b) ove odluke. Rok od deset, odnosno tri radna dana računa se od dana prijema rješenja.

(3) Ako Središnji ured nosiocu prava odobri podnijeti zahtjev iz člana 5. ove odluke, roba se, na osnovu rješenja iz stava (1) ovog člana, privremeno zadržava i za daljih deset radnih dana, odnosno tri radna dana u slučaju lako kvarljive robe od dana donošenja odluke po zahtjevu. U daljem postupku preduzimanja carinskih mjera za zaštitu prava zbog povrede patenta po tom odobrenom zahtjevu, odgovarajuće se primjenjuju odredbe ove odluke koje uređuju preduzimanje carinskih mjera za zaštitu prava zbog povrede patenta na osnovu odobrenog zahtjeva nosioca prava.

(4) Ako nosilac prava, u roku iz člana 18. stav (2) ove odluke, ne podnese zahtjev iz člana 5. ove odluke, Središnji ured će nadležnom carinskom organu o tome dostaviti pismenu obavijest. Nadležni carinski organ će, u tom slučaju, odobriti stavljanje privremeno zadržane robe u zahtjevani carinski postupak po podnesenoj carinskoj prijavi, uz ispunjenje ostalih uslova propisanih za stavljanje odnosne robe u taj postupak, o čemu će odmah obavijestiti uvoznika robe.

GLAVA VII - TROŠKOVI I ŠTETA

Član 20.

(Troškovi i šteta)

(1) Troškove i eventualnu štetu koja nastane u provođenju ove odluke, ni u kom slučaju, ne snosi UIO, odnosno država BiH.

(2) Nosilac prava nema pravo na naknadu štete od UIO, odnosno države BiH ni u slučaju da roba za koju je odobren njegov zahtjev iz člana 5. ove odluke nije otkrivena od strane UIO, da je puštena ili da nije pokrenut postupak za njeno zadržavanje.

Član 21.

(Troškovi i šteta koju snosi nosilac prava)

(1) Troškove i eventualnu štetu koja nastane u vezi sa robom za koju su preduzete carinske mjere u skladu sa ovom odlukom snosi nosilac prava, osim u slučaju iz člana 22. ove odluke.

(2) Primjena stava (1) ovog člana ne isključuje pravo nosioca prava da naknadu troškova i eventualne štete koju je snosio u skladu sa odredbama ove odluke zahtjeva od lica za koje se utvrdi da je njegovom robom povrijeđen patent.

Član 22.

(Troškovi koje snosi uvoznik robe)

U slučaju iz člana 18. stav (3) i člana 19. stav (4) ove odluke troškove snosi uvoznik robe.

GLAVA VIII - OSTALE ODREDBE

Član 23.

(Odnos prema drugim propisima i žalba)

(1) Primjena odredaba ove odluke ne isključuje primjenu drugih carinskih propisa koji uređuju provođenje mjera carinskog nadzora i provjere robe, odnosno provođenje carinskog postupka.

(2) Ako odredbama Zakona o carinskoj politici Bosne i Hercegovine ("Službeni glasnik BiH", br. 57/04, 51/06, 93/08 i 54/10) i odredbama ove odluke nije drugačije propisano, na postupak po odredbama ove odluke primjenjuju se odredbe Zakona o upravnom postupku ("Službeni glasnik BiH", br. 29/02, 12/04, 88/07 i 93/09).

(3) Žalba uložena na rješenje donijeto u provođenju ove odluke, shodno članu 7. Zakona o carinskoj politici Bosne i Hercegovine, ne odlaže izvršenje tog rješenja.

Član 24.

(Evidencija i razmjena podataka)

(1) UIO će, za potrebe primjene ove odluke i izvještavanja, uspostaviti i voditi odgovarajuću evidenciju o zahtjevima nosioca prava iz člana 5. ove odluke i o carinskim mjerama preduzetim u skladu sa ovom odlukom.

(2) Institut BiH ili drugi nadležni organ, za potrebe primjene ove odluke, dužan je UIO dostaviti ili omogućiti pristup informacijama o registrovanim nosiocima prava prema Zakonu o patentu.

(3) UIO će, na zahtjev Instituta BiH ili drugog nadležnog organa, dostaviti podatke o kojima vodi evidenciju u skladu sa stavom (1) ovog člana.

GLAVA IX - PRELAZNE I ZAVRŠNE ODREDBE

Član 25.

(Postupak za zaštitu prava zbog
povrede patenta u toku i drugi postupak)

(1) Postupak preduzimanja carinskih mjera u vezi sa robom kojom se povređuje patent pokrenut do dana početka primjene Zakona o patentu okončaće se prema propisima po kojima je pokrenut.

(2) Na postupak preduzimanja carinskih mjera u vezi sa robom kojom se povređuje patent pokrenut nakon početka primjene Zakona o patentu a koji nije okončan do stupanja na snagu ove odluke, primjenjuje se ova odluka.

(3) Zahtjev za preduzimanje carinskih mjera za zaštitu prava zbog povrede patenta zaprimljen prije stupanja na snagu ove odluke po kojem do stupanja na snagu ove odluke nije donijeto rješenje, smatra se kao da nije ni podnjet.

Član 26.

(Stupanje na snagu)

Ova odluka stupa na snagu osmoga dana od dana objavljivanja u "Službenom glasniku BiH".

VM broj _____
_____ godine
Sarajevo

Predsjedavajući
Savjeta ministara BiH
Nikola Špirić, s.r.